

জনসংযোগ অফিস
জাহাঙ্গীরনগর বিশ্ববিদ্যালয়
সাভার, ঢাকা, বাংলাদেশ
ফোন: ৭৭৯১০৪৫-৫১



Public Relations Office
Jahangirnagar University
Savar Dhaka Bangladesh
Phone: +88027791045-51

প্রেস বিজ্ঞপ্তি

জাবিতে প্রজাপতি মেলা অনুষ্ঠিত ॥
বিশ্ববিদ্যালয় কর্তৃপক্ষ ভৌত অবকাঠামোগত উন্নয়নের পাশাপাশি
প্রাকৃতিক পরিবেশ অক্ষুণ্ণ রাখবে
-জাবি উপাচার্য ড. ফারজানা ইসলাম

জাহাঙ্গীরনগর বিশ্ববিদ্যালয়, ২ নভেম্বর ২০১৬।

জাহাঙ্গীরনগর বিশ্ববিদ্যালয়ের অতিথি পাখি আর প্রজাপতির কথা আমরা জানি। আজ বনশ্রী থেকে ভোরে ছুটে এসেছি নানা রঙের প্রজাপতি দেখার জন্য। এখানে কতো রঙের প্রজাপতি দেখেছি। প্রজাপতির অনেক ছবিও গাছে ঝুলানো হয়েছে। সব কিছু দেখে মনটা ভরে গেছে। ঢাকার বনশ্রী থেকে আসা তৃতীয় শ্রেণির ছাত্রী মালবিকা নিপুন আজ জাহাঙ্গীরনগর বিশ্ববিদ্যালয়ে অনুষ্ঠিত প্রজাপতি মেলায় একথা জানান। নিপুনের বাবা সিদ্ধার্থ রায় জানান, মেয়ের ইচ্ছে পূরণ করতে তিনি পরিবার-পরিজন নিয়ে প্রজাপতি মেলায় এসেছেন। জাহাঙ্গীরনগর বিশ্ববিদ্যালয়ের পরিবেশ ও প্রকৃতি খুব ভালো লাগে। এজন্য প্রতিবারই এ মেলায় ছুটে আসেন।

সকাল দশটায় বিশ্ববিদ্যালয়ের জহির রায়হান মিলনায়তনের চত্বরে এ মেলা উদ্বোধন করেন প্রধান অতিথি উপাচার্য অধ্যাপক ড. ফারজানা ইসলাম। উদ্বোধনী ভাষণে উপাচার্য বলেন, প্রজাপতি একটা অসাধারণ পতঙ্গ। প্রজাপতির সৌন্দর্যে আমরা মুগ্ধ এবং প্রজাপতির বাহারি রঙ আমাদের মন আনন্দে ভরিয়ে দেয়। শিশু কিশোররা প্রজাপতির ছবি আঁকে। প্রজাপতির গান শোনে। তারা প্রজাপতিকে ভালোবাসে। এ মেলার মাধ্যমে সবাই বুঝতে পারে যে, প্রজাপতি প্রকৃতিরই অংশ। উপাচার্য তাঁর ভাষণে সরকারের পক্ষ থেকে প্রায় দেড় হাজার কোটি টাকার উন্নয়ন প্রকল্পের অর্থপ্রাপ্তির বিবরণ দিয়ে বলেন, বিশ্ববিদ্যালয় কর্তৃপক্ষ ভৌত অবকাঠামোগত উন্নয়নের পাশাপাশি প্রাকৃতিক পরিবেশ অক্ষুণ্ণ রাখতে অঙ্গীকারবদ্ধ। এক্ষেত্রে তিনি অভিজ্ঞদের সহযোগিতা কামনা করেন। অনুষ্ঠানে বিশেষ অতিথি হিসেবে বক্তব্য রাখেন প্রো-উপাচার্য অধ্যাপক ড. মো. নুরুল আলম, কোষাধ্যক্ষ অধ্যাপক শেখ মো. মনজুরুল হক, জীববিজ্ঞান অনুষদের ডিন অধ্যাপক ড. আবদুল জব্বার হাওলাদার, ভারপ্রাপ্ত রেজিস্ট্রার রহিমা কানিজ, চ্যানেল আই-এর পরিচালক এবং প্রকৃতি ও জীবন ফাউন্ডেশনের চেয়ারম্যান মুকিত মজুমদার বাবু। অনুষ্ঠানে প্রাণিবিদ্যা বিভাগের সভাপতি অধ্যাপক ড. গোলাম মোস্তফা, বনবিভাগের কর্মকর্তা, বিশ্বব্যাংকের কর্মকর্তাগণও বক্তব্য রাখেন। উদ্বোধনী অনুষ্ঠানে স্বাগত বক্তব্য রাখেন প্রাণিবিদ্যা বিভাগের শিক্ষক ও মেলার উদ্যোক্তা অধ্যাপক ড. মনোয়ার হোসেন। উদ্বোধনী অনুষ্ঠানে ‘বাটারফ্লাই এ্যাওয়ার্ড ২০১৮’ প্রদান করা হয়। উপাচার্য প্রজাপতি অবমুক্ত করে এবং বেলুন উড়িয়ে প্রজাপতি মেলা উদ্বোধন করেন এবং উদ্বোধনী অনুষ্ঠানের পর উপাচার্যের নেতৃত্বে একটি র্যালি বের হয়।

দিনব্যাপী অনুষ্ঠিত মেলায় চিত্রাঙ্কন প্রতিযোগিতা, কুইজ, বক্তৃতা, প্রজাপতি বিষয়ক বিতর্ক প্রতিযোগিতা, প্রজাপতির ডকুমেন্টারি প্রদর্শনীর আয়োজন করা হয়।

পরিচালক (ভারপ্রাপ্ত)
জনসংযোগ অফিস